

Arfersiorfiup ukiukkut qimussimik tuttunniarfiusalernissaa siunertaralugu Naalakkersuisut peqquneqarnissaannik Inatsisartut aalajangiffigisassaattut siunnersuut. Piffissaq ukiukkut piniarfusoq tamaat isigalugu, sumiiffiup siunnersuutigineqartup qanitaani nalunaarutip atuuttup aalajangersagai assigalugit suliaqartoqassaaq.
(Inatsisartunut Ilaasortaq Kristian Jeremiassen, Inuit Ataqatigiit)

Akissuteqaat

(Aalisarnermut Piniarnermullu Naalakkersuisoq)

Aappassaaneerneqarnera

Arfersiorfiup ukiukkut qimussimik tuttunniarfiusalernissaa siunertaralugu Naalakkersuisut peqquneqarnissaat pillugu Inatsisartut aalajangiiffigisassatut siunnersuutip aappassaaneerneqarnissaanut Aalisarnermut, Piniarnermut Nunalerinermullu Ataatsimiititaliap isumaliutissiisummik saqqummiussaqaqarneranut Naalakkersuisut qujapput. Siunnersuutip UKA2022-mi siullermeerneqarneranut akissuteqaammi Naalakkersuisunit itigartitsinermut tunngavilersuutigineqartut aallarniutigalugu innersuussutigissavakka.

Assartuutit motorillit ullutsinni pingaartumik sikukkut aalisarnermi annertuumik assartuutigineqartalerikuupput pinngitsoorneqarsinnaajunnaarlutik. Taakkuupput qimmit qimuttut ikiligaluttuinnarnerannut pequtaanerpaasutut nalilikkakka. Assartuutit motorillit sikukkut aalisarnermiinnaangitsumi atorneqartarput, nunakkulli ingerlaarnermi aamma atorneqartarlutik.

Ukiuni kingullerni Kangaatsiap aqutsiveqarfiani killilimmik ukiuunerani tuttunniarsinnaaneq nalinginnaasuunngilaq. Taamaallaallu sumiiffimmi aalisarnerup ajornarsilluinnarnerani periarfissatut atorneqartarsimalluni. Sumiiffimmi pineqartumi aalisartut piniartullu ikioqullutik saaffiginninnerat tunngavigalugu immikkut ittumik akuersissuteqarnikuuvugut. Taamaammat ukiuunerani tuttunniarnerup piniarfinnut allanut – soorlu Naternami Arfersiorfimmuut taamatullu allanut – atuutilersinneqarnissaa inassutiginaangilaq.

Ukiuunerani qimussiinnarmik tuttunniarneq siunnersuutigineqartoq nakkutigiuminaassaaq, pissutigalugu illoqarfiit nunaqarfiillu avataanni assartuutininik motorilinnik atuineq nakkutigiuminaaeremat. Assartuutit motorillit tuttunut annertuumik akornusiisarput.

Kangaatsiap aqutsiveqarfiani ukiuni kingullerni ukiuunerani tuttunniartoqarnerani ilaatigullu pisarinngitsuukkanik umimmanniartoqarnerani Naalakkersuisunit misilittakkavut imaapput: piniartut qimussimik aallaraluarlutik ullut arlallit atorlugit piniarfimmukarlutik ilaatigut piniakkanik takusaqartarsimangillat, taamaallaalli assartuutit motorillit aqutikui, naak piffinni allani assartuutininik motorilinnik peqarfiuvallaangitsuni qimussimiit pisaqartarneq iluatsittoqartaraluartoq.

2023-mut aningaasanut inatsimmi aalisarnermut piniarnermullu nakkutilliinissamut tamakkiisumik 40,4 mio. kr.-t aningaasaliissutaapput. Inatsisartut peqqusineratigut Naalakkersuisut aalisarnermut piniarnermullu nakkutilliisoqarnerup tamakkiisumik nalilersorneqarnissaa pillugu nalunaarusiortoqartoq erseqqissaatigissavara, Naalakkersuisullu naatsorsuutigivaat suliap naammassineqarnissaani aningaasanik amerlanerusunik pisariaqartitsisoqarsinnaanerani ilanngullugu nalunaarusiami ilanngunneqarumaartoq. Taamatut oqaaseqarlunga Naalakkersuisut isumaliutissiisummumut qujaqqillutik siuliini pissutsit eqqumaffigisassat taaneqartut innersuutigaaq.